

Œuvres complètes de l'Abbé J.-B. Favre 1727-1787

LOU TRESOR DE SUBSTANCIOUN

Coumedia en un acta

J. -B. FAVRE

EPITRA DEDICATORIA

Éu voudrièi ben vous oufri, per estrena,
Quauque presen que vouguesse la pena:
Noun pas d'arjent, car n'ai pas jes de foun,
E per bonur vous n'avès pas besoun.
Faudriè quicon que vous faguèsse rire,
De poulis vers; mès acò's de bon dire.
L'on coumpren ben à peu près ce que fau,
E pioi d'ou faire, aqui lou petassau.
Aqueles vers, per n'apounjá la cima,
Vous berquou tout, la garlopa e la lima;
En vous mourden, en vous gratan lou fron,
N'en trouvas un, e l'autre se rescon,
Cercas, sounjas, vous tuas, e pecaire!
Lou pus souven vous ou cau tout desfaire,
Ou se trouvas la rima que voulès,
En ben riman, resounas de travès.
Dous michants vers vous costou mila penas,
De-que sera se n'en cau de doujenas!
La pouésia es un mestiè de bau,
Costa lou sen e mena à l'espitau...
Mès atabé i'a certènas causetas
Qu'on pot pas dire en terme de sournetas!
N'en cau cercá lou veritable toun,
E tout lou pris depend de la façoun.
Lou dau presen que pretende vous faire
Es couma acò: Que n'en costa per plaire!
Lou pus drolle, es que quand l'on reussis,
Es à l'autou à dire: gramecis!
Iéu vau tachá de n'avedre la pena
En vous dounen, se pode, bona estrena;
N'ai fantasiè, mès entendeguen-nous;
De tems en tems, i'aura quaucas cansous.
S'arriva, pioi, que la rima se taise,
La laissaren founá tout à soun aise:
Quand revendrá, tourná la reprendren,
E, se s'en vai, tourná la quitaren.